

Ka Guhuren Meyitenged ki Hunas

Igpewun-a

Ka seini ne baseen, migpangguhud meytenged te sabeka ne prupita ne egngaranan ki Hunas. Diye sikandin mig-ugpe te Israil te igkahibang ne balabahan dapit te igsile, me 250 ne leg-un ka miglihad te pegkeimpus ni Dabid te mighari. Ka seini ne baseen, kene ne iling te duma ne me guhuren meytenged te pegpanagne, su migpanengneng seini meytenged te neula-ula te sabeka ne prupita ne ware migtuman te insuhu te Manama kandin ne egpeendiyeen te siyudad te Ninibi. Ware sikandin migtuman te insuhu kandin su nakataha sikandin ne kene egbulusan te Manama te eglepad ka seeye ne siyudad ke eg-inniyug ka me etew te me sale dan. Piru tenged te kein-inuwan ne natamanan din, napehes sikandin ne miggendiye te Ninibi wey migpangguhud te igpahuhud kandin te Manama. Nataman, neenenduenan sikandin wey nasakitan puun su ware iya natuman ka ingkahi rin diye te me etew ne egleparan te Manama ka inged dan.

Nahuhud degma te seini ne baseen ne egpalintutuu te Manama ka langun ne innimu rin iling te weyig, ngalap, kalamag wey duma pad. Piru labew te langun, nahuhud kayi ne hiid-uwen ka Manama wey dakel ka geyinawa rin, su minsan ka kuntere te keet-etawan din, impasaylu rin wey inluwas din te mig-inniyug e sikandan te me sale dan.

Ka nasulat te seini ne baseen

Ka pegsupak ni Hunas te suhu te Manama *1:1-17*

Ka peg-ampu ni Hunas *2:1-10*

Ka peggendiye ni Hunas te Ninibi *3:1-10*

Ka langet ni Hunas te pegkeyid-u te Manama te matig-Ninibi *4:1-11*

Ka pegsupak ni Hunas te suhu te Manama

1 ^{1a} Due etew ne egngaranan ki Hunas ne anak ni Amittay. Sabeka ne aldew migkahiyen sikandin te Magbebaye ne Manama, ²“Dagdahew ka hendiye te Ninibi, ka dakel ne siyudad wey panpanayin nu ka me mahinged diye su nakamaan-maan ad e te mareet ne hinimuwan dan.” ³Piru nekeisip mule si Hunas ne egpallahuy diye te Tarsis^b eyew egpakapariyu te Magbebaye ne Manama. Puun due, migtupang sikandin peendiye te Hupa wey due barku ne nakita rin diye ne eggendiye te Tarsis. Migbayad sikandin te pliti rin wey mig-untud e eyew egpakariyu-diyu te Magbebaye ne Manama.

⁴Piru te nalanting e ka barku, migpeuyan ka Magbebaye ne Manama te makeseg ne kalamag diye te dahat. Ne migderakel e amana ka me bunlud wey hendue te egkahuhus e ka barku ne mig-unturan dan. ⁵Nenaaldek ka langun ne me trabahanti te barku wey migpangananey ka tagse sabeka te me manama ran. Impandepak dan diye te dahat ka impandulan te barku eyew egmaagkap naan de. Piru si Hunas, diye mule te kinariraleman te barku wey nakaliplipereng sikandin diye.

⁶Ne dutu, miggendiyaan sikandin te kepitan te barku wey migkahiyen, “Hey, mania te migliplipereng ke re due? Enew ka wey pangananey ka te keykew ne manama. Kema ke egkeyid-u red sikandin kanta wey egpangabangan ki nikandin eyew kene ki egkengalened.”

⁷Ne dutu, migpalalahey ka me trabahanti ne migkahi, “Kema, egpintut-pintut ki eyew egkanengnengan ta ke hentew ka egpuunan te karereetan ne migginguma kanta.” Ne migpintut-pintut en iya sikandan wey si Hunas ka natinuru. ⁸Ne migkahi sikandan, “Nangeni key ke mania te miggingumaan ki te karereetan kuntee. Nekey-a ka trabahu nu, wey hendei ka egpuun? Hendei ka ne mahinged wey nekey-a ka tribu nu?”

⁹Ne migtabak si Hunas, “Sabeka a ne Hibruwanen wey ka impalintutuwan ku ne Magbebaye, sika se Manama ne diye te langit ne miggimu te dahat wey tane.” ¹⁰Ne mignangenan e sikandan ni Hunas te migpallahuy sikandin te Magbebaye ne Manama.

Puun due, naaldek amana ka me trabahanti te barku wey migkahiyen dan sikandin, “Keyey, makaaldek-haldek amana seini se innimu nu.”

¹¹Ne dutu egkalihet e degma egmakeseg ne subla ka kalamag wey ka me bunlud, purisu mig-insaan dan e si Hunas, “Egmenuwen ney buwa sikekew eyew egpeeneng-eneng e ka dahat ne egdaldaleet?”

¹²Ne migtabak si Hunas, “Iantug e re nikaniyu te dahat eyew egpeeneng-eneng e ka kalamag wey ka me bunlud su nakanengneng a te sikeddiey ka egpuunan kayi.”

^a 1:1 2Har 14:25. ^b 1:3 Ka Tarsis nekegdiyu te Ninibi.

¹³Piru migpakannekal migpamegsey ka me trabahanti su eyew egpakatuhun perem ka barku diye te ilis. Piru ware neyimu ran su nanasnasian pad ne migmakeseg ka kalamag. ¹⁴Purisu migpangananey sikandan te Magbebaye ne Manama ne migkahi, “E Magbebaye, egpeyid-u-hid-u key keykew ne kene key gulaa tenged su eggimatayan ney ka seini ne etew. Kene key senditi ke ware sale te etew ne eggimatayan ney, su seini se neyitabu keykew ma ne igkeupii Magbebaye ne Manama.” ¹⁵Ne innenat dan e si Hunas wey in-antug dan e diye te dahat. Ne sahuhone ne migpeeneng-eneng ka makeseg ne kalamag wey ka me bunlud. ¹⁶Puun dutu, amane e egkaaldek te Magbebaye ne Manama ka me etew, wey migbehey sikandan te igpanubad dan te Magbebaye ne Manama wey migsaad ne egpamakey kandin.

^{17c} Ne migsuhu ka Magbebaye ne Manama te dakel ne ngalap ne egparawiyen ki Hunas. In-abeleng te ngalap si Hunas, wey tatelu ne aldew wey marusilem sikandin diye te getek te ngalap.

Ka peg-ampu ni Hunas

- 2** ¹Ne mig-ampu si Hunas te Magbebaye ne Manama rin te diye din e te getek te ngalap. ²Miggenendue sikandin, “Te keyirapan ku Magbebaye ne Manama, in-umew ku sikeykew wey intabak a nikeykew. Puun te inged te me minatey, migpangananey a keykew wey indineg a nikeykew.
- ³ Indegpak a nikeykew diye te pused te dahat, wey nakaseneb a te weyig wey natanled a te derakel ne me luwak wey me bunlud ne impeuyan nu.
- ⁴ Nakakahi a, ‘Nakariyu-diyu ad te tangkaan nu, wey kena ad egpakakita te matulus ne timplu nu.’^d
- ⁵ Naleplep a te dakel ne weyig wey natanled a. Ne nabeleberan ka ulu ku te me hilamunen te dahat.
- ⁶ Natanled a diye te kinariraleman te weyig, diye te igtubu te me bubungan ne hendue te naprisu a ne warad kaligwangan te ware egtamanan. Piru Magbebaye ne Manama ku, impalepew e red nikeykew ne neuyag pad puun diye te kinariraleman.
- ⁷ Te naheram ku ne egkabigtawan ad e, migpangananey a keykew Magbebaye ne Manama wey indineg nu ka peg-ampu ku diye te matulus ne timplu nu.
- ⁸ Ka me etew ne migsimba te me diyus-diyus ne ware karuan, mig-inniyuhan dan e ka hid-u nu kandan.
- ⁹ Piru sikeddiey, egpanubad a keykew ne eg-ul-ulahing te pegpasalamat, wey egtumanen ku ka insaad ku. Ka kaluwasan diye egpuun keykew Magbebaye ne Manama.”

^c 1:17 Mat 12:40. ^d 2:4 Diye te duma ne sinulat: piru eg-iman-iman e red man-e ne egpiteme te matulus ne timplu nu.

¹⁰Ne dutu, insuhu e te Magbebaye ne Manama ka ngalap wey inluwe e si Hunas diye te ilis te dahat.

Ka peggendiye ni Hunas te Ninibi

3 ¹Ne migkahiyan e man-e te Magbebaye ne Manama si Hunas, ²“Dagdahew ka hendiye te Ninibi, ka dakel ne siyudad wey ipangguhud nu diye ka igpahuhud ku keykew.” ³Ne dutu, migpalintutuu e si Hunas te ingkahi te Magbebaye ne Manama wey miggendiyad te Ninibi. Dakel amana ne siyudad ka Ninibi su egtatelu ne aldew ka peggipanew seled te seeye ne inged. ⁴^e Migsenge kaaldew si Hunas ka miggipanew te pegseled din te siyudad. Pegkapenga due, migpangguhud e sikandin ne miggenendue, “Te hep-at ne pulu (40) ne aldew puun kuntee, egdereetan e seini se inged ne Ninibi!”

⁵Ne seeye se me matig-Ninibi, migpalintutuu te Manama wey nasabeka sikandan langun ne migpuasa ligkat te me meyaman peendiye te egkaayu-ayu, wey migsaluub sikandan te saku isip palinneu te peglungku dan.

⁶Te pegkarineg dutu te Hari te Ninibi, migsasindeg sikandin puun te trunu rin wey inluung din e ka mahal ne kumbale din wey migsaluub e sikandin te saku wey migpinnuu diye te abu. ⁷Ne impataha rin ka me matig-Ninibi te miggenendue, “Seini ka suhu te Hari wey te me upisyal din: ka langun ne etew wey ka me ayam, keilangan ne kene egkeen wey eg-inum. ⁸Keilangan ne ka langun ne etew egsaluub te saku, wey ka me ayam dan degma egpanaluuban dan. Ne keilangan ne eg-ampu ka langun diye te Manama ne malehet iya ne egpuun te pusung dan, wey eg-inniyuhan dan ka maddeet ne batasan wey hinimuwan dan. ⁹Su kema ke egkabalbalawan ded ka suman-suman te Manama wey egkabewu red ka langet din kanta eyew kene ki red egkahule.”

¹⁰Te nakita te Manama ka innimu ran ne peg-inniyug te mareet ne hinimuwan dan, nabalbalawan e ka suman-suman din meytenged te pegdereet din perem kandan wey ware din e seeye ipabulus.

Ka langet ni Hunas te pegkeyid-u te Manama te matig-Ninibi

4 ¹Ne puun te seeye ne neyitabu, natameneng amana si Hunas wey nalangetan sikandin. ²^f Ne mig-ampu sikandin te Magbebaye ne Manama ne migkahi, “Magbebaye, seini iya ka nasuman-suman ku ne egkeyitabu te diye e pad te inged ku. Ne sika ka egpuunan ne egpallahuy a perem diye te Tarsis su nakataha a Manama ne meupiya ka, hiid-uwen ka, wey kene ne mahaan ne egkabelu. Dakel ka geyinawa nu, wey andam te pegbalew-balew te insuman-suman nu ne pegdereet te me etew. ³^g

^e 3:4-5 Mat 12:41; Luk 11:32. ^f 4:2 Iks 34:6. ^g 4:3 1Har 19:4.

Purisu Magbebaye ne Manama, kua nud mule ka umul ku su meupiya pad ke egpatey a du te egkeuyag pad.”

⁴Piru migtabak ka Magbebaye ne Manama, “Eleg naa ne igkabelu nu seini?”

⁵Ne miglihawang e si Hunas te siyudad wey miggendiye te dapit te igsile te siyudad wey diye migpinpinuu. Migleleeb sikandin wey miggelung dutu ka egtetahad ke nekey ka egtamanan te Ninibi. ⁶Ne dutu, migpatubu ka Magbebaye ne Manama te sabeka ne pinamula ne egpakatimpa ki Hunas eyew egkaralungan sikandin. Nahale amana si Hunas tenged te pinamula. ⁷Piru te egkasi-si e ka kaliwaswasan, migpeuyan ka Manama te uled ne deisek ne migketket te pinamula, sikan naa ka nalan e seini. ⁸Te migsile e ka aldew, migpeuyan e man-e ka Manama te meinit ne kalamag puun te igsile. Napangkag ka ulu ni Hunas te aldew wey natabeleg sikandin. Seeye naa, egkeupian e sikandin ne egpatey ne migkahi, “Meupiya pad iya ke egpatey a du te egkeuyag e pad.”

⁹Piru mig-insaan sikandin te Manama, “Eleg naa ne igkabelu nu ka intamanan te pinamula?”

Ne migtabak si Hunas, “Uya, eleg iya ne igkabelu ku sika. Sikan naa, meupiya pad ke egpatey ad e.”

¹⁰Ne migkahi ka Magbebaye ne Manama, “Neyimenawan ka te pinamula ne ware nu ikalasey, wey kene ne sikeykew ka migpatulin kayi. Migtubu seini wey migpatey te senge karusileman de. ¹¹Ne iyan e naan pa iya kene meyd-u te Ninibi, ka dakel ne siyudad ne due subla te 120,000 ne me etew ne ware pad nakanengneng te mareet wey meupiya^h, wey te sesalihi ne me ayam dan?”

^h 4:11 Te Hibuwanen: ware nakanengneng ke hendei ka kawatan wey gibang ne belad.